

[Augsburg], 4. Dezember 1568

An Johannes Crato von Krafftheim

UB Breslau, Ms. 9820 (Rehdigeriana 246), Nr. 335 (fol. 446r-v).

Clariss[imo] D. Io[anni] Cratoni etc.

Breuem me esse cogit et κεφαλαλγία et occupatio scholastica. κλιμακτήρες ἐβδοματικοὶ καὶ ἐννεατικοὶ sunt valde generales, nec ferè nocent nisi cum malis priuatis cuiusque progressionibus coniuncti. Ego extra hos grauissima quaeque sum perpessus. Aulica seruitus, quam aerumnosa sit, malo credere quam experiri, atque ex animo precor, vt tibi verè viuere liceat. et quidem licet εὖ τιθημένῳ τὰ παρόντα. Fortuna sua quenque sequitur. Vbicunque fueris ἡ σ, ἡ σ, te quietum esse non sinent, vti vicissim, ἡ ⊖ ψ, ἡ ⊕ ψ, et ψ, ψ. ὡς γὰρ ἐπεκλώσαντο θεοί. Quid vero? εἰ πάντες ἀποθανούμεθ' οἵς μὴ γίγνεται ἢ βουλόμεθα πάντες ἀποθανούμεθα. Neque tamen credo te fortunam tuam cum imperatoris velle commutatam. Me Musae et conscientia sustentant. praeterea quod delectet nihil est, quae taedium vitae afferant, permulta. Nec tamen iniussu imperatoris de statione vitae decedendum. De Rhaetico quae scribis, eò mihi grata sunt, ne sperem frustra. Cypriani directiones parum abfuit quin hac hyeme patronum inuenirent. Sed is bellicis tumultibus deterritus, veritus est, ne sortis etiam iacturam faceret, si 600 f. typographo mutuos dedisset. Mei typographi Pernam imitati, verba mihi dant. Quare in animo habeo, post Cal[endas] Ianuarij ipse Basileam ire. Camerarium infectis rebus discessisse doleo. Grauiora et ipse timeo. ἀλλὰ γενηθήτω τὸ θέλημα τοῦ θεοῦ: quod vbi ex animo dicere didicerimus, aequiore animo feremus omnia. Vale et ignosce. aliàs plura. Pridie Nonas Decembris 1568.

Hiero[nymus] Wolfius.

Literae inclusae Argentina ad me missae sunt.